

Titos

Wossa keeththa kalethizaytnae wordo astamarista

¹ Xoossas doretidayta amanoninne tumu ayanan kallethiza tumma eratethan dichanamala Xoossa aylene Yesus Kirstosape kitetida Phawulosape. ² Iza amanoyinne eratethay kaasepe ooykidi wordotonta Goday daro wodeppe kasse ba imida medhina deyo ufaysa malakko. ³ Izi kasse gidamala nuna ashida Xoossa azazon hadara imetida sabakon ba qaala qonccisides. ⁴ Nus kothe gidida tumu amanon ta na Titos “Xoossa aawape nuna ashida Yesus Kiristossape kiiyatethane sarotethi nes giido.

Qarxasen Titosa Ootho

⁵ Ta nena qarxxesen agiday burope giigana bessiza daro mishi diza gish ne giganamalane ta nena azazidamala katamay dizason wossa keeththa ciimata ne doranasa. ⁶ Cmatethan doristanayti ista bolla boroy bayndayta, isi machi azinata, nayti amanizaytane waysontayta woykko azazetiza nayta awata gideto. ⁷ Wossa keeththa ciimay Xoossas oothana hadara ekidade gididamala iza bolla wothay bayndade gidanas beses. Hesiikka ceqetizade, gutha miishan ylotizadene mathotizade, ushanchanne izas besonta ogera go7a gididaz godi eki bizade gidanas besena. ⁸ Hesafe bollara izi imath makiizade loo7o ootho dosizade berka bena hariizade sure

as xiilone bes nagetizade gidanas beses. ⁹ Hara asata loo7o timrten miithethzadenne he loo7o timirteza ixizayta hanqanas ba tamaridamala qalan minizade gidanas beses. ¹⁰ Waysizaytine dunan xalala balethzayti daroti detes; harapekka heyti qaxaretida Ayhuda asatape amanida asata bagatakko. ¹¹ Heytanta co77u histethi beses. Gaasoyka isti besonta oogera bes go7a demanas besonta timrte tamarson keeththa asa wursi moron detes. ¹² Ista Nabistappe isadey ista gish hasa7ishe "Qarxesa asay wuriso wode wordanchatane ita do7ota ganjjemane azalata" giides. f/ nabeza sunthi Epimenidese. ¹³ He markatethay tumu hessa gish ne ista loo7etha hanqista. Hesikka ista tumma amanoy danamalasa. ¹⁴ Ayhuddata haysu7e woykko tumu yooppe hakida asata azazo isti siyopetto. ¹⁵ Geshatas mishi wurikka geshsha shin tu- atasinne amnontaytas gidikko wurikka tunakko. Harapekka ista qohaaththaaykka wurikka tunides. ¹⁶ Isti bena nu Xoosu eros getes shin ba hanotethan dikokka gidiko kadetes. Isti shunizayta, azazetontaytanne loo7o oothos besontaytakko.

2

Tummu timirte

¹ Ne gidikko asa tumu gididaz tamarsa.
² Cimma asay wozinama bonchetidayta bena berkka harizayta amanoninne siiqon danda7anka loo7o gidanamala ista zora.
³ Hesathoka cima maccashati bee diza dussan bonchora dizaytanne loo7o hanoteth asa

tamarisizayta gideto attiin asa sunthu isizayta woykko woyne ush ussa suken waxetidayta gidonta mala ista tamarsa. ⁴ Hesatho oothikko natetha maccashati ba azinatane ba nayta dosanamala tamarsanas dandadha7etes. ⁵ Xoossa qalay oona achanka cayetontamala isti berikka bena harizaytane geshata keeththa gidon ista oothoy ooykidaytanne asas kiyyata ba azinatas azazetizayta giidanamala ciima maccashati ista tamariseto. ⁶ Hesathokka yalaga atumasay berka bena haranamala ne ista zaro. ⁷ Ay hanonkka ne asas loo7o lemuso gida. Ne asa tamarsiza timirteza nekka wozinape tamarisizadene nagizade gida. ⁸ Nu gish ita has7iza asay hasa7anas iita demonta agidi yelatanamala ne has7iiza hasa7a garsan borso yoy doppo. ⁹ Ayleti azanka ba Godatas haristanamalanne ufaysanamala qasekka awute zarontamala tamarisa. ¹⁰ Hanizazan wurison nuna ashida Xoossa timirtey dosistanamala isti loo7o markateth besanamala ba godata mishe kaysotopeto. ¹¹ Asas izape maroy betiza Xoossa kiyyatethi asa wursos qonccides. ¹² He kiyyatethaykka nuni nagaran dusune ha alame amotetha kadidi hayssa ha wodezan nurkka nuna haridine xiilotethan tumu ayana dus danaysa nuna tamarises. ¹³ Hesikka nus anjjetida ufays gidida woga Xoossane nuna ashida Yesus Korstosa bonchoy qooncanaysa naganasa. ¹⁴ Izikka nuna itetethafe wozanasinne loo7o oothanas miiniza ba dere bees doranas bena nus aathi iimides. ¹⁵ Hessa gish ne tamarsanayti heytanta. Hessakka ne kumetha

Godatethara zoranne hanqqa nena oonikka kadhoppo.

3

Loo7o Ootho

¹ Assay dere aysizaytas haristanamalane loo7o gidida miish wursi oothanas giga gidanamala asa qofissa. ² Qasekka oonikka asa bollla iita hasa7ontamalane loo7o asa gidanamala asa wursos kumetha wozinappe ba ashketeth besanamala wuisa qofissa. ³ Nukka kasse qofay bayndaytane azazetontayta ne balletizayta duma duma amoninne loo7o dusas ayletethan haretizaytakko. Asarane nurka nu gasanka oyetishe itatethaninne miqaynetethan doos. ⁴⁻⁵ Gido attiin nuna ashida Xoossa kiiyatethinne iza siqqoy qonccida wode nu oothida xiilotethan gidonta dishin iza marotetha daron atidos, izi nuna ashiday nam7antho yeleteth gidida mechaninne Xiillo Ayanan ooraxetethankko. ⁶ Hesaka Xiillo Ayanay nu bolla nu Gooda Xoossi nuna ashida Yesus Kirstosa bagara keezi darsi gusides. ⁷ Hesikka nu iza kiiyatethan xillidi medhiina deyo ufays ooyki layzayta gdanasa. ⁸ Hesikka amanetida qaala. Xoossa amanizayti loo7o oothos bena aathi imanamala hayssa ubbaa ne lo7etha yotanamala ta koyays. Hesikka loo7one ay asika koyizaza. ⁹ Qassekka coo hada palamapenne asay ba qomo qodizazape, lalefenne woga gish dendiza ooshafe ne hakka. Heytanti go7oy baynda pathonta yokko. ¹⁰ Asa garsan shakoteth medhiza asa isi to nam7u to ne zorin ekonta ixiko izadera nes ispetethi

doppo. ¹¹ Hesa mala asi baletida nagarancha asa izadey berkka ba bolla piirdidaysa ne era.

Wursethe zare.

¹² Arxximone woykko Tikiqosa ta neekko kiiitikko ne tako Niqqoliyonne yanas nes danda7etizaz ubbaa ootha. Tani halaytha ballgo hen athana gada qachadis. ¹³ Woga eriza Zemasayne Aphillossay biishin istas koshzaz ubbaa kuntha mada. ¹⁴ Nu bagatas hachis hachis ista koshizaz isti demanamalane ista dethay goo7oy bayndaz gidontamala isti loo7o ootho oothi minanamala tamaranas koshes. ¹⁵ Tanara dizayti intena saro getes. Amano gedon nuna siiqqizayta wursi saro giite. Xoossa kiyatethi intenara gido.

Gamo Geesha Maxxafa New Testament
The New Testament in the Gamo language of
Ethiopia: Gamo Geesha Maxxafa New Testament

copyright © 2017 The Word for the World International

Language: Gamotso

Contributor: The Word for the World Ethiopia

Gamo Geesha Maxxafa New Testament

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

PDF generated using Haiola and XeLaTeX on 21 Feb 2024 from source files dated 9 Apr 2023

67a804de-b81d-5cd7-ab9c-f723c8f46f78